



Broj: 04/5-50-134-9-1/16  
Sarajevo, 29.04.2016.

**PREDMET:** Informacija sa 91. Rose-Roth seminara Parlamentarne skupštine NATO-a, održanog u Rabatu, Maroko, od 20.04 do 22.04.2016.

Na 91. Rose-Roth seminaru, koji je održan u Rabatu, Kraljevina Maroko, u periodu 20-22.4.2016. učestvovali su: Nikola Lovrinović, predsjedavajući Delegacije Parlamentarne skupštine BiH u Parlamentarnoj skupštini NATO-a i Asim Sarajlić, član Delegacije.

Učesnicima 91. Rose Roth seminara su se u uvodnom dijelu obratili Rachid Talbi El-Alami, predsjedavajući Predstavničkog doma i Hakim Benchemas-predsjedavajući Doma senatora Parlamenta Kraljevine Maroka, Massimo Baggi-ambasador Švajcarske Konfederacije u Kraljevini Maroko i ambasadorica Laura Thompson, zamjenica generalnog direktora IOM, Međunarodne organizacije za migracije.

Predstavnici Parlamenta i Vlade Kraljevine Maroka su prezentovali aktuelni trenutak Kraljevine Maroko gdje su se osvrnuli na aktuelnu političku i ekonomsku situaciju u zemlji, status i implementaciju odredbi novog Ustava, odnosima sa susjedima i NATO te stanju u regionu.

Delegacije zemalja učesnica skupa pozvale su na saradnju, posebno zemalja regiona Srednjeg istoka i Sjeverne Afrike (MENA), s ciljem uspostavljanja stabilnosti u području Mediterana.

Tokom rasprave o jedinstvenoj međunarodnoj strategiji u suprotstavljanju sigurnosnim izazovima u zemljama MENA, izražena je krajnja zabrinutost i osuđeni su svi teroristički akti u kojima su ubijeni brojni nevini ljudi.

Predstavnici zemalja muslimanskog svijeta pozvani su na jedinstvo u borbi protiv narastajućeg zla. S tim u vezi, učesnici 91. Rose – Roth seminara posebno su insistirali na jasnom međunarodnom, diplomatskom i vojnom odgovoru na stanje u Siriji, Libiji i Iraku.

Izražena je nepodijeljena zabrinutost stanjem u Libiji, te upućen poziv da se traga za rješenjima koja će stabilizovati stanje u toj zemlji.

Kad je riječ o odgovoru NATO-a na krize u zemljama MENA, istaknut je značaj jedinstvenog pristupa i preduzimanja mjera u sređivanju stanja i pomoći onima koji žele mir i normalan razvoj zemalja tog regiona.

Izražena je potreba dalje reforme sigurnosnog sektora u zemljama MENA regiona, te su države članice NATO-a pozvane da pomognu onima koji žele stabilizaciju prilika u regionu.

U vezi s aktuelnom migrantskom krizom, delegacije su pozvale na saradnju i uspostavljanje zajedničkih projekata za rješavanje krize. Zemlje tranzita pozvane su na uspostavljanje dijaloga i parlamentarne diplomatije, kontrole granica, kao i na humano postupanje prema izbjeglicama i migrantima u zemljama tranzita.

Sve međunarodne organizacije također su pozvane da pruže pomoć izbjeglicama i migrantima.

Informaciju sastavio:  
Željko Grubešić

PREDSJEDAVAJUĆI DELEGACIJE  
Nikola Lovrinović